



Sumáriu Kazu
Tribunál Distritál Suai
Fevereiru 2022

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza :17

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime públiku)	2
Artigu 177 KP	Abuzu seksuál ba menór ho natureza violénsia doméstika	1
Artigu 145 KP no Artigu 258 KP	Ofensa ba integridade fizika simples no danu simples	1
Artigu 316 KP	Kontrabandu	4
Artigu 1757, 1758, 1759, 1762, 1765, 1786, 1782, 1804, 1805 KS	Ezersísiu poder paternál	1
Artigu 145 KP	Ofensa ba integridade física simples	1
Artigu 260 KP	Danu ho violénsia	1

Artigu 138 KP no Artigu 145	Omisídiu simples no ofensa ba integridade fizika simples	1
Artigu 181 KP	Ezibisionizmu seksuál	1
Artigu 207 KP	Kondusaun sem karta	1
Artigu 20 (1) Lei Arma Brankas	Arma brankas	2
Artigu 252 KP	Furtu agravadu	1
Total		17

2. Totál desizaun ne'ebé JSMP monitoriza:10

Tipu pena	Artigu	Númeru
Suspensaun ba prizaun nia ezekusaun	Artigu 68 KP	2
Pena multa	Artigu 67 KP	2
Omologa	Artigu 216 KPP	4
Multa no absolve	Artigu 67 KP	1
Totál		10

3. Totál kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua prosesu tuir JSMP nia monitorizasaun: 7

1. Krime danu ho violénsia

Nú. Prosesu : 0053/16.CVSUI
 Kompozisaun Tribunál : Koletivu
 Juis : Dr. Benjamin Barros, Dr. Samuel d. C. Pacheco no Dra. Patricia
 de Araújo Fatima Barreto Magno Xavier
 Prokuradór : Dr. José Elo
 Defeza : Dr. Domingos dos Santos
 Desizaun : Omologa dezisténsia keixa

Iha 03 Fevereiro 2022, Tribunál Distritál Suai prezide julgamentu leitura sentensa ba krime danu ho violénsia ne'ebé envolve arguidu Almerio da Costa no Ana da Resurição hasoru lezada Regina d. R no Santana d. R, iha Munisípiu Covalima.

Akuzasaun prokuradór

Prokuradór akuza katak iha 03 Janeiro 2016, iha oras tuku 12:00 meudia, lezada Regina da Resuricão fila husi igreja, testemuña Linda, Carla no Yanti lori lezada nia fahi inan ida ne'ebé arguida Ana da Resuricão nia kaben tuda mate.

Tuir mai iha oras tuku 15:00 lokraik, lezada ba iha arguidu Almerio do Carmo no Ana da Resuricão nia uma ho objetivu atu haruka selu lezada nia fahi ne'ebé arguida nia laen tuda mate. Maibé iha momentu ne'eba arguida Ana da Resuricão diskuti malu ho lezada no dehan lakohi selu, ho nune'e sira rakut malu arguida Ana foti ai-sar baku dala rua iha lezada RdR nia ain, arguidu Almerio foti ai-bebak matak hodi baku dala barak iha lezada Regina nia kaba'as parte karuk to'o ai-bebak ne'e rahun, bainhira lezada Santana hase arguidu katak labele baku Regina, hafoin ne'e arguidu Almerio foti tan ai-bebak ida baku dala ida iha lezada nia ulun no tuku dala ida iha lezada nia matan fukun no foti tan ai-kabelak ida atu baku tan lezada santina maibé Almerio Gusmão mak hadau tiha ai-kabelak no lakonsege baku lezada.

Prokuradór akuza arguidu no arguida kontra artigu 260 KP kona-ba krime danu ho violénsia ho moldura penál tinan 4 to'o tinan 12.

Produsaun ba prova sira

Iha julgamentu, arguidu no arguida konfesa faktu hotu iha akuzasaun no deklara katak depoisde akontesimentu ne'e liutiha fulan lima arguidu no lezada dame malu fali ona no selu fila fali lezada sira nia fahi ho valor osan US\$50.00 ne'ebé arguida nia laen tuda mate. Arguidu no arguida deklara katak foin primeiravés mai hatan iha tribunál, arrepende ona sira ninia hahalok no to'o agora lahalo problema hasoru lezada sira.

Alende ne'e, lezada kontinua konfirma faktu hotu iha akuzasaun no deklara katak dame malu fali ona no fahi ne'ebé arguida nia laen tuda mate selu fali ona. parte seluk lezada Santana mós konfirma faktu hotu no deklara katak dame malu ona no to'o ohin lora la iha ona problema.

Antes atu tama ba alegasaun final tribunál haree katak krime ne'e la priense elementu husi krime danu ho violénsia tuir artigu 260 KP, ho nune'e tribunál koletivu halo alterasaun kualifikasaun husi krime danu ho violénsia ba fali artigu 145 KP kona-ba krime ofensa ba integridade fízika simples, no imidiata julgamentu ne'e dirije fali husi tribunál singular.

Mesmu arguidu/a sira antes ne'e dame malu ona, maibé tribunál husu atu arguidu/a sira dame malu fali perante tribunál, nune'e arguidu/a no lezada sira dame malu no arguidu/a promete sei la repete tan hahalok hanesan iha futuru.

Alegasaun finál

Prokuradór no defeza husu ba tribunál omologa prosesu ne'e no absolve arguidu/a sira instansia krime ne'e.

Desizaun

Tribunál bazeia ba akordu dame ne'ebé antes ne'e parte sira halo ona, tribunál omologa akordu ne'e no absolve arguidu sira.

2. Kazu sivíl regulasaun ba ezersísiu podér paternál

Nú. Prosesu	: 0003/20 CVTDS
Kompozisaun Tribunál	: Singulár
Juis	: Dr. José Maria Araújo
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Omologa dezisténsia keixa

Iha 09 Feveireiru 2022, Tribunál Distritál Suai prezide julgamentu tentativa konsiliaun ba kazu regulasaun ezersísiu podér paternál, ne'ebé envolve autór CVAC ho idade tinan (7) no GRAC tinan (5) hasoru rekeridu FCP no rekerida FIFA nu'udar autór nia aman no inan, iha Munisípiu Covalima.

Termu no fundamentu sira

Iha data no fulan ne'ebé la apura, maibé iha 2019, rekeridu serbisu iha Natarbora, maibé iha finde semana sempre vizita ninia oan nain rua iha Suai, maibé iha data no fulan ne'ebé la apura bainhira iha finde semana rekeridu ba vizita ninia oan sira, bainhira fila rekeridu la fó hatene ba rekerida no nia oan sira rekeridu lori ninia roupa hotu fila ba Natarbora. Depoisde ida ne'e rekeridu la vizita ona ninia oan sira no la tau matan ona ba ninia oan nain rua ninia nesesidade, tuir mai família rua tuur hamutuk rezolve maibé la iha solusaun, nune'e rekeridu no rekerida separa tiha. Ho nune'e prokuradór reprezenta menór sira hatama asaun kontra rekeridu hodi tau -matan ba menór sira ninia nesesidade. Rekeridu hanesan Doutor ho salariu kada fulan US\$ 573.00.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

Tentativa konsiliaun

Iha julgamentu tentativa konsiliaun ne'e, rekerida deklara ba tribunál katak menór sira agora dadaun hela ho rekerida maibé rekeridu nunka fó alimentasaun, nune'e rekerida husu atu kada fulan rekeridu tenke fó alimentasaun ba menór nain rua kada fulan

US\$400.00, maibé arguidu husu atu hatun uituan, tanba arguidu ninia vensimentu kada fulan ho valor US\$573.00, tanba ne'e tribunál husu ba rekerida atu hatun valor ba alimentasaun ne'e bazeia ba rekeridu ninia pedidu, nune'e rekerida konkorda ho pedidu tribunál nian atu kada fulan rekeridu tenke fó US\$150.00 ba menór nain rua. Rekeridu aseita ho pedidu ne'e no deklara katak prontu atu fó alimentasaun ba menór sira kada fulan US\$150.00 hahú husi fulan Marsu 2022, ba iha rekerida nia konta bankária maibé rekeridu ejije ba direitu vizita tanba husi nia parte deklara nia laiha problema sekarik menór nain rua kontinua hela ho rekerida nune'e husi parte rekerida no rekeridu konkorda atu menór nain rua kontinua hela ho rekerida no konkorda atu rekeridu livre vizita menór nain rua.

Alegasaun finál

Prokuradór reprezenta menór nain rua no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór nain rua.

Desizaun

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

3. Krime kondusaun sem karta

Nú. Prosesu	: 0075/19.PDSUA
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. José Elo
Defeza	: Dr. Albano Maia
Desizaun	: Pena multa US\$60.00

Iha 10 Feveireu 2022, Tribunál Distritál Suai prezide julgamentu leitura sentensa ba krime kondusaun sem karta ne'ebé envolve arguidu Luis Magno hasoru Estadu RDTL, iha Munisípiu Ainaro.

Akuzasaun prokuradór

Prokuradór akuza katak iha 26 Dezembru 2017, iha oras tuku 09:40 dadeer, arguidu uza motorizada ba mai iha estrada públiku no bainhira polísia tránzitu pasa rebista deskobre katak arguidu laiha karta kondusaun

Prokuradór akuza arguidu kontra artigu 207 KP kona-ba kondusaun sem karta ho moldura penál tinan 2 ka multa.

Produsaun ba prova sira

Iha julgamentu, arguidu konfesa faktu hotu iha akuzasaun, arrepende nia hahalok no deklarata katak depoisde akontesimentu arguidu la konduz ona motorizada durante fulan neen nia laran. Depoisde arguidu iha tiha karta kondusaun mak kondus fali motorizada no arguidu mós deklarata katak hatene lori motorizada desde 2009, maibé laiha karta kondusaun.

Alegasaun finál

Prokuradór haktuir katak arguidu provadu komete krime ne'ebé akuza ba arguidu, bazeia ba konfisaun arguidu nian no arguidu mós iha kondisaun ekonomia, nune'e husu ba tribunál atu kondena arguidu ho pena multa US\$120.00.

Entretantu defeza husu ba tribunál atu kondena arguidu ho pena admoestasaun, tanba arguidu konfesa, arrepende nia hahalok no depoisde akontesimentu ne'e la konduz ona motorizada no agora dadaun arguidu iha ona karta kondusaun.

Desizaun

Depoisde avalia faktu hotu, tribunál prova katak arguidu arguidu uza motorizada ba mai iha estrada públiku no bainhira polísia trázitu pasa rebista deskobre katak arguidu laiha karta kondusaun

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, nune'e tribunál konklui prosesu ne'e no kondena arguidu ho pena multa US\$60.00, ne'ebé kada loron arguidu sei selu US\$1.00 durante loron 60. Tribunál mós fiksa pena alternativa durante loron 60 prizaun, bainhira arguidu la selu pena multa refere.

4. Krime kontra bandu

Nú. Prosesu	: 0005/18.CVSLL
Kompozisaun Tribunál	: Koletivu
Juis	: Dra. Patricia de Araújo. F. B. M. Xavier, Dr. Samuel d. C. Pacheco no Dr. Benjamin Barros.
Prokuradór	: Dr. José Elo
Defeza	: Dr. Albano Maia
Desizaun	: Pena multa US\$30.00

Iha 15 Feveireiru 2022, Tribunál Distritál Suai prezide julgamentu leitura akordaun ba krime kontra bandu ne'ebé envolve arguidu Quintino Moniz no Gregorio do Nascimento hasoru Estadu RDTL, iha Munisípiu Covalima.

Akuzasaun prokuradór

Prokuradór akuza katak iha 28 Feveiru 2018, iha oras tuku 7:00 dadeer, arguidu nain rua halo kontratu ho sidadaun Indonézia hodi sosa gajolina litru 35 hamutuk jerigen haat no kada jerigen arguidu sira sosa ho folin US\$25.00, jerigen haat ne'e ho total osan hamutuk US\$100.00. Bainhira arguidu nain rua simu tiha gajolina jerigen haat ne'e no lalin atu ba faan iha Suia Vila, iha dalan membru Unidade Patroelamentu Fronteira (UPF) haree no prende kedas objetu sira ne'e tanba arguidu sira sosa objetu ne'e la liuhusi dalan legal no lori kedas arguidu sira submete ba iha investigasaun iha Postu Salele, tanba arguidu sira nia hahalok ne'e hamosu prezuiju ba estadu.

Prokuradór akuza arguidu sira kontra artigu 316 KP kona-ba kontra bandu ho moldura penál tinan 2 too tinan 6 ka multa.

Produsaun ba prova sira

Iha julgamentu, arguidu nain rua konfesa integralmente ba faktu hotu iha akuzasaun prokuradór nian, arguidu sira deklara katak hatama mina ne'e laos atu faan maibé ense ba sensor hodi kua-ai kubik hitu atu halo uma adat. Arguidu sira mós deklara katak foin primeiravés hatama mina no depoisde akontesimentu ne'e lahatama ona mina to'o agora, foin primeiravés mai hatan iha tribunál, arrepende sira nia hahalok no promete sei la repete hahalok ne'e iha futuru.

Alegasaun finál

Prokuradór, konsidera arguida sira provadu komete krime kontrabandu tuir faktu sira iha akuzasaun sein iha lisensa nune'e la selu taxa ba Estadu no hamosu prezuiju ba Estadu. Tanba ne'e, husu ba tribunál atu kondena arguidu sira ho pena prizaun tinan rua fulan neen suspende ba tinan tolu no kondena arguidu sira selu kustu judisiál no objetu aprendidu a favor ba estadu.

Entretantu, defeza haktuir katak arguidu sira konfesa faktu hotu no arrepende sira nia hahalok katak futuru larepete ninia hahalok, tanba ne'e husu ba tribunál atu kondena arguidu sira ho pena multa.

Desizaun

Depoisde avalia faktu hotu, tribunál prova katak arguidu nain rua halo kontratu ho sidadaun Indonézia hodi sosa gajolina litru 35 hamutuk jerigen haat no kada jerigen arguidu sira sosa ho folin US\$25.00, jerigen haat ne'e ho total osan hamutuk US\$100.00, hodi hatama ilegalmente mai Timor Leste.

Bazeia ba faktu provadu sira ne'e no tetu mós ho sirkunstansia atenuante sira hanesan, arguidu sira arrepende ona sira nia hahalok foin primeiravés mai hatan iha tribunál, nune'e tribunál konklui prosesu no kondena arguidu nain rua ho pena multa US\$30.00,

ne'ebé arguidu sira sei selu US\$0.50 kada loron durante loron 60. Tribunál mós fiksa pena alternativa durante loron 40 prizaun bainhira arguidu la kumpri pena multa refere.

5. Krime kontra bandu

Nú. Prosesu : 0004/19.CVSL
Kompozisaun Tribunál : Koletivu
Juis : Dra. Patricia de Araújo. F. B. M. Xavier, Dr. Samuel da Costa Pacheco no Dr. Benjamin Barros.
Prokuradór : Dr. Rafael Jeronimo Gusmão
Defeza : Dr. Albino de Jesus Pereira
Desizaun : Pena prizaun tinan 3 suspende ba tinan 4

Iha 15 Feveireiru 2022, Tribunál Distritál Suai prezide julgamentu leitura akordaun ba krime kontra bandu ne'ebé envolve arguidu Boavida Ximenes, Jacinto Amaral no Maximilianos hasoru Estadu RDTL, iha Munisípiu Covalima.

Akuzasaun prokuradór

Prokuradór akuza katak iha 30 Janeiru 2019, iha oras tuku 16:00 lokraik, arguidu sira hatama gajolina litru 35 hamutuk jerigen tolu ilegalmente liuhusi mota masin no arguidu sira sosa gajolina jerigen tolu ne'e total osan US\$100.00, hafoin arguidu sira tula gajolina atu ba faan iha Suai Villa, maibé to'o iha dalan area Nikir Polisia UPF halo pasa revista no halo apreensaun objetu ne'e no lori arguidu sira submete ba investigasaun iha postu UPF Casabauk.

Prokuradór akuza arguidu kontra artigu 316 KP kona-ba krime kontra bandu ho moldura penál tinan 2 too tinan 6 ka multa.

Produsaun ba prova sira

Iha julgamentu, arguidu nain tolu konfesa integralmente ba faktu hotu, arguidu sira deklara katak nesesidade mak obriga nune'e halo aktividade hirak ne'e, alende arguidu sira mós deklara katak foin primeiravés mai hatan iha tribunál, arrepende sira ninia hahalok no promete sei la repete hahalok ne'e iha futuru.

Prokuradór husu ba tribunál atu presindi testemuña sira ninia depoimentu, tanba arguidu sira konfesa faktu hotu iha akuzasaun.

Alegasaun finál

Prokuradór, haktuir katak mezmua arguidu sira konfesa faktu hotu, maibé krime kontra bandu aas tebes iha area fronteira sira, nune'e atu prevene krime ne'e akontese tan iha

futuru, husu ba tribunál atu kondena arguidu sira ho pena prizaun tinan rua suspende ba tinan rua no objetu aprendidu afavor ba estadu.

Entretantu defeza, husu ba tribunál atu aplika pena ne'ebé kmaan ba arguidu sira ho konsiderasaun sira katak, arguidu sira konfesa no arrepende ona ba sira ninia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu sira hatama gajolina litru 35 hamutuk jerigen tolu ilegalmente liuhusi mota masin no arguidu sira sosa gajolina jerigen tolu ne'e ho total osan hamutuk US\$100.00, maibé to'o iha dalan area Nikir Polisia UPF halo pasa revista no halo aprensaun ba objektu ne'e no lori arguidu sira submete ba investgasaun iha postu UPF Casabauk.

Bazeia ba faktu provadu sira ne'e tetu mós ho sirkunstánsia atenuante sira hanesan arguidu sira konfesa, arrepende sira ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu sira ho pena prizaun tinan tolu suspende ba tinan haat, enkuantu objetu aprendidu afavor ba estadu.

6. Krime ofensa integridade fizika simples ho natureza violénsia doméstika

Nú. Prosesu	: 0025/20.CVSLL
Kompozisaun Tribunál	: Singulár
Juis	: Dra. Patricia de Araújo. F. B. M. Xavier
Prokuradór	: Dr. Rafael Jeronimo Gusmão
Defeza	: Dr. Albino de Jesus Pereira
Desizaun	: Pena prizaun fulan 6 suspende ba tinan 1

Iha 15 Feveiru 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika, ne'ebé envolve arguidu LX hasoru nia eis feen, iha Munisípiu Covalima.

Akuzasaun prokuradór

Prokuradór akuza katak iha 11 Abril 2020, iha oras tuku 18:00 lokraik arguidu tuku dala ida iha lezada nia inus, tuku dala barak iha lezada nia ulun parte karuk, aktu hirak ne'e rezulta lezada nia inus raan. Antes agresaun ne'e, lezada tolok ninia oan feto nune'e arguidu defende ninia oan feto hodi halo agreasaun hirak ne'e hasoru lezada. Kazu ne'e aneksu ho relatóri médiku forensiku.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, 3(a), 35 (b) no 36 LKVD.

Produsaun ba prova sira.

Iha julgamentu, arguidu konfesa faktu hotu iha akuzasaun no deklarata katak lezada tolok sira nia oan feto nune'e arguidu nervoju no komete aktu hirak ne'e hasoru lezada, arguidu mós deklarata katak separa ona ho lezada no arrepende ona nia hahalok.

Alende ne'e lezada kontinua konfirma faktu hotu iha akuzasaun no deklarata katak moris separa ona ho arguidu.

Alegasaun finál

Prokuradór, konsidera arguidu provadu komete krime ofensa ba integridade física simples ho natureza violénsia doméstika hasoru nia eis feen tuir konfisaun arguidu nian no konfirmasaun hosi lezada rasik, nune'e husu ba tribunál atu kondena arguidu ho pena suspensaun.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun sira katak, arguidu konfesa no arrepende ona nia hahalok.

Desizaun

Depoizde avalia faktu hotu, tribunál prova katak arguidu tuku dala ida iha lezada nia inus tuku dala barak iha lezada nia ulun parte karuk aktu ne'e rezulta lezada sofre raan iha lezada ni ainus. Bazeia ba faktu provadu sira no tetu mós ho sirkunstánsia atenuante sira hanesan arguidu foin priemeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

7. Krime ofensa ba integridade física simples no danu simples

Nú. Prosesu	: 0039/21 VCSUI
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Pena multa US\$120.00 no absolve

Iha 16 Feveiru 2022, Tribunál Distritál Suai prezide julgamentu leitura sentensa ba krime ofensa ba integridade física simple ne'ebé envolve arguidu DBGL hasoru lezada CM, iha Munisípiu Covalima.

Akuzasaun Prokuradór

Prokuradór akuza katak iha 09 Maiu 2021, iha oras tuku 14:00 lokraik, arguidu tuku dala ida iha lezada nia inus rezulta raan. Antes agresaun ne'e, arguidu ho lezada diskute

malu kona-ba arguidu fukit hotu lezada nia ai- horis ne'ebé kuda iha rai baliza entre arguidu ho lezada nian no depoisde akontesimentu ne'e, xefe aldeia no inan aman sira tuur atu rezolve problema ne'e tuir tradisaun Timor nian, maibé arguidu lakohi no komete atu hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simple ho moldura penál tinan 3 ka multa no artigu 258 KP kona-ba danu simples ho moldura penál tinan 3 ka multa.

Produsaun ba prova sira

Antes tama ba produsaun ba prova, tribunál bazeia ba artigu 262 KPP halo tentativa konsiliaun ba kazu ne'e, maibé lezada lakohi nune'e kontinua ba julgamentu.

Iha prosesu julgamentu, arguidu konfesa faktu sira hotu iha akuzasaun no deklara katak arguidu fukit ai-horis ne'ebé lezada kuda, tanba kuda tama liu ba arguidu ninia plantasaun, arguidu deklara tan katak momentu atu rezolve tuir família maibé lezada kolia fali arguidu ninia eskola no veteranus no hatete katak hahalok ladiak nune'e arguidu nervoju no komete aktu ne'e hasoru lezada. Arguidu hatutan liután katak arrepende nia hahalok no promete sei larepete hahalok ne'e hasoru lezada inklui ema seluk iha futuro, arguidu hanesan funsionariu publiku iha meu ambiente kada fulan ho vensimentu US\$240.00 no vensimentu veteranus nian US\$250.00, arguidu deklara mós katak foin primeiravés mai hatan iha tribunál.

Alende ne'e lezada kontinua konfirma faktu hotu iha akuzasaun no deklara katak lakohi dame ho arguidu, lezada haktuir katak ai-horis ne'ebé arguidu fukit ne'e kuda duni iha lezada ninia baliza no laos kuda iha arguidu nia rai.

Testemuña Jose Godino nu'udar xefe aldeia depoimenta katak iha akontesimentu ne'e lezada ho arguidu iha problema kona-ba fukit ai-horis ne'ebé lezada kuda iha baliza, tanba ai-horis ne'ebé lezada kuda tama liu ba arguidu ninia rai no momentu atu rejolve problema ne'e mak, arguidu nervoju tuku dala ida iha lezada nia inus no rezulta raan. Testemuña depoimenta tan katak rai ne'ebé lezada kuda ai-horis ne'e arguidu nia rai.

Alegasaun finál

Prokuradór konsidera arguidu provadu komete aktu ne'e hasoru lezada, tanba ne'e husu ba tribunál atu kondena arguidu ba kada krime ho pena prizaun tinan ida no krime rua ne'e kondena ho pena prizaun tinan rua no suspende ba tinan rua.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun sira katak, arguidu konfesa, arrepende nia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu tuku dala ida iha lezada nia inus rezulta raan. Antes agresau ne'e, arguidu ho lezada diskute malu kona-ba arguidu fukit hotu lezada nia ai- horis ne'ebé kuda iha rai baliza entre arguidu ho lezada nian.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena multa US\$120.00 ne'ebé kada lora arguidu sei selu US\$1.00 durante lora 120. Tribunál mós fiksa pena alternativa durante lora 20 prizaun, bainhira arguidu la selu pena multa refere.

8. Krime ofensa ba integridade fizika simples

Nú. Prosesu	: 0013/18.CVSUI
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Omologa dezisténsia keixa

Iha 17 Feveireu 2022, Tribunál Distritál Suai prezide julgamentu tentativa konsiliaun ba krime ofensa ba integridade fizika simples ne'ebé envolve arguidu Fernando Moniz hasoru lezadu Paolo Moniz, iha Munisípiu Covalima.

Akuzasaun prokuradór

Prokuradór akuza katak iha 14 Juñu 2018, iha oras tuku 12:00 meudia, arguidu tuku dala rua iha lezadu nia hasan parte karuk, tebe dala ida iha lezadu nia kotuk laran. Antes agresau ne'e, arguidu ho lezadu diskuti malu kona-ba arguidu nia manu aman ne'ebé lakon, nune'e arguidu nervoju halo agreasaun hirak ne'e hasoru lezadu.

Prokuradór akuza arguidu kontra artigu 145 KP kona-ba ofensa integridade fizika simples ho moldura penál tinan 3 ka multa.

Produsaun ba prova sira

Bazeia ba artigu 262 Kódigu Prosesu Penál, antes tama ba produsaun ba prova juis husu atu halo tentativa konsiliaun ba arguidu ho lezadu.

Iha prosesu tentativa konsiliaun ne'e lezadu prontu atu dada fali ninia keixa hasoru arguidu, maibé husu ba arguidu atu labele repete ninia hahalok ne'e hasoru lezadu no

ema seluk iha futuru. Arguidu simu lezadu ninia pedidu ne'e no pruntu atu halo tuir saida mak lezadu hatete, arguidu mós deklara katak arrepende ninia hahalok no promete sei larepete hahalok ne'e iha futuru.

Alegasaun finál

Prokuradór no defeza husu ba tribunál atu omologa akordu dame entre arguidu ho lezadu no absolve arguidu hosi krime ne'e.

Desizaun

Bazeia ba akordu dame husi parte rua, tribunál konklui prosesu ne'e no omologa akordu **ne'e**.

9. Krime ezibisionizmu seksuál

Nú. Prosesu	: 0085/19.PDSUA
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Omologa dezisténsia keixa

Iha 21 Feveireiru 2022, Tribunál Distritál Suai prezide julgamentu tentativa konsiliaun ba krime ezibisionizmu seksuál ne'ebé envolve arguidu JM hasoru lezada AdSdJ, iha Munisípiu Manufahi

Akuzasaun prokuradór

Prokuradór akuza katak iha 02 Marsu 2019, iha oras tuku 9:00 dadeer, lezada ba fase roupa iha bee matan ne'ebé iha duut laran, hafoin ne'e arguidu tuir lezada ho kondisaun molik no dehan ba lezada katak *ó fase roupa ka* no lezada hatan katak *hau fase roupa*, dehan tiha nune'e arguidu fila tiha, maibé liutiha minutu lima hanesan ne'e arguidu ba tan bee matan no hatudu arguidu ninia orgaun seksuál ba lezada, hafoin arguidu fila tiha. Tuir mai liutiha minitu sanolu resin lima arguidu ba tan bee matan no kontinua hatudu ninia orgaun seksuál ba lezada, nune'e lezada hatete ba arguidu katak orsida fila ba uma *hau sei fó hatene ba ó nia feen*, depoisde fila husi bee matan lezada ba fó hatene ba arguidu ninia feen no kontinua apresenta keixa iha polísia.

Prokuradór akuza arguidu kontra artigu 181 KP kona-ba ezibiosionizmu seksuál ho moldura penal tinan 3 ka multa.

Produsaun ba prova sira

bazeia ba artigu 262 KP kona-ba tentativa konsiliaun, tribunál halo tentativa konsiliaun ba arguidu no lezada.

Iha tentativa konsiliaun ne'e, lezada apresenta ba tribunál pedidu dame ne'ebé antes ne'e arguidu ho lezada halo ona tuir lisan Timor nian no iha tentativa konsiliaun ne'e tribunál labele rona arguidu ninia deklarasaun, tanba arguidu pozitivu Covid-19 no iha hela karentina.

Alegasaun finál

Prokuradór no defeza apresia ho akordu ne'ebé parte rua halo ona no husu ba tribunál atu omologa prosesu ne'e.

Desizaun

Bazeia ba pedidu dame ne'ebé lezada hatama, mezmú arguidu la marka prejensa iha julgamentu ne'e ho razaun tanba arguidu pozitivu Covid-19 no iha hela karantina, maibé tribunál kontinua omologa akordu dame ne'ebé lezada hatama no sei notifika arguidu atu halo opozisaun durante prazu lora lima, enkuantu durante prazu lora lima ne'e mak arguidu la halo opozisaun katak la simu dezisténsia ne'e tribunál fó, tribunál sei notifika parte sira hodi mai julgamentu, maibé durante lora lima nia laran mak arguidu la halo opozisaun, dezisténsia ne'e vale.

10. Krime ofensa ba integridade fizika simples ho natureza violénsia doméstika

Nú. Prosesu	: 0102/18.PDSUA
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. José Elo
Defeza	: Dr. Angelmo Pinto
Desizaun	: Absolve

Iha 28 FEVEREIRU 2022, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika, ne'ebé envolve arguidu NSP hasoru nia eis feen, iha Munisípiu Covalima.

Akuzasaun Prokuradór

Prokuradór akuza katak iha lora no fulan ne'ebé laapura maibé iha tinan 2015, arguidu tuku dala ida iha lezada nia ibun no buti dala ida lezada nia kakorok rezulta lezada sofre moras iha ibun no kakorok. Antes agresaun ne'e, arguidu ho lezada diskute malu kona-ba arguidu ho lezada sei nafatin hela ho lezada ninia inan aman, arguidu husu atu ho lezada ba hela iha fatin seluk, maibé lezada lakohi, ho nune'e mosu agresaun hirak ne'e.

Tuir mai iha 25 Agostu 2018, iha oras tuku 21:00 kalan, arguidu tuku dala tolu iha lezada nia hasan sorin karuk rezulta raan. Antes agresaun ne'e, arguidu ho lezada diskute malu kona-ba sira nia oan monu, nune'e arguidu komete aktu ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu iha akuzasaun, arguidu deklara katak akontesimentu iha tinan 201, arguidu iha lia mate ida maibé lezada ho nia família la partisipa lia mate refere no banhira lia mate ne'e hotu arguidu fila no arguidu hatete ba lezada katak hakarak hela ketak husi lezada ninia inan aman maibé lezada lakohi nune'e arguidu nervoju komete aktu ne'e hasoru lezada. Entretantu kona-ba akontesimentu iha 25- 08- 2018, arguidu deklara katak la komete aktu ne'e hasoru lezada.

Alende ne'e lezada kontinua konfirma faktu hotu iha akuzasaun no deklara katak sira morsi separa ona no to'o agora arguidu nunca vizita ninia oan no la fó osan ba ninia oan.

Testemuña JdJA nu'udar lezada nia maun, depoimenta katak iha akontesimentu iha 2015 no 2018 ne'e testemuña rona katak arguidu ho lezada problema, maibé testemuña la haree. Testamuña depoimenta katak dala ida sira nia oan fetu ho nia avo fetu ba misa no misa sai fila ba uma iha iha dalan arguidu hadau tiha labarik husi ninia avo fetu maibé derepente testemuña mós to'o iha fatin akontesimentu nune'e testemuña hadau fali labarik husi arguidu.

Testemuña JS hanesan arguidu nia primu depoimenta katak iha akontesimentu ne'e ho arguidu atu ba Dili no liu husi lezada nia uma oin ho intensaun arguidu atu fó osan ba ninia oan, maibé bainhira arguidu atu fó osan lezada ho arguidu diskute malu no arguidu la konsege fó osan ba ninia oan, tanba labarik tauk no halai tiha, testemuña depoimenta liután katak laharee arguidu baku lezada.

Alegasaun finál

Prokuradór haktuir katak iha julgamentu arguidu konfesa parsialmente ba faktu iha akuzasaun, arguidu deklara katak akontesimentu iha 2015 baku duni lezada dala ida maibé akontesimentu iha 2018 arguidu nega, mezmu nune'e lezada kontinua konfirma faktu hotu iha akuzasaun. Entretantu testemuña sira nia deklarasaun hatete katak arguidu ho lezada iha problema maibé sira lahare arguidu halo agresaun fizika hasoru

lezada. Ho razaun hirak ne'e prokurador fiar katak arguidu ninia hahalok ne'e priense duni elementu husi krime ofensa ba integridade fizika simples, nune'e husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza, haktuir katak arguidu deklarada de'it faktu ne'ebé nia komete no reforsa mós husi testemuña, tanba ne'e husu ba tribunál atu kondena arguidu ho pena admoestasaun.

Desizaun

Depoisde avalia faktu hotu, ne'ebé produs durante julgamentu tribunál konsidera katak kazu ne'ebé akontese iha 2015, tribunál preskreve tiha tanba liu ona prazu. Enkuantu ba krime ne'ebé akontese iha 2018, tribunál konsidera la provadu, ho nune'e tribunál konklui prosesu ne'e no absolve arguidu husi prosesu ne'e.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>